

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI / ZASTUPNIČKI DOM
DOM NARODA / ДОМ НАРОДА**



**Zajednička komisija za odbrambenu/obrambenu
i sigurnosnu politiku i nadzor nad radom
odbrambenih/obrambenih i sigurnosnih
struktura na nivou/razini BiH**

**БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ
ПРЕДСТАВНИЧКИ ДОМ
ДОМ НАРОДА**

**Зажедничка комисија за одбрамбену и
безбједносну политику и надзор над радом
одбрамбених и безбједносних структура
на нивоу БиХ**

Broj/Број: 4/1-50-1-149-13/04
Sarajevo/Сарајево: 06.10.2004. godine

ZAPISNIK

Trinaeste sjednice Zajedničke komisije Parlamentarne skupštine BiH za odbrambenu i sigurnosnu politiku i nadzor nad radom odbrambenih i sigurnosnih struktura na nivou BiH koja je održana u 06.10. 2004. godine u vremenu od 10,00 do 15,00 sati.

Sjednici su prisustvovali članovi Zajedničke komisije: Boško Šiljegović, Šefik Džaferović, Momčilo Novaković, Adem Huskić, Seada Palavrić, Halid Genjac, Vinko Radovanović, Osman Brka i Branko Zrno.

Sjednici nisu prisustvovali Vinko Zorić, opravdano, te Anto Spajić i Mirko Blagojević.

Sjednici su prisustvovali i: poslanici Jozo Križanović, Zlatko Lagumdžija i Miloš Jovanović, Nikola Radovanović, Marina Pendeš i Enes Bećirbašić iz Ministarstva odbrane BiH, Vesko Drljača, predstavnik Ministarstva sigurnosti BiH, Mudžahid Hasanbegović, predstavnik OHR-a, Neven Kazazović, ekspert Parlamenta FBiH, Christian Haupt iz OSCE-a.

Pored navedenih, sjednici su prisustvovali i Dragica Hinić, privremeni sekretar Zajedničke komisije i Željko Grubešić, ekspert za pomoć u radu Zajedničke komisije.

Sjednicom je predsjedavao Boško Šiljegović.

Za raspravu na sjednici predložen je slijedeći

DNEVNI RED:

1. Razmatranje Prijedloga zakona o izmjenama i dopunama Zakona o uvozu i izvozu oružja i vojne opreme (predlagač: Vijeće ministara BiH);
2. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlagač: poslanik Momčilo Novaković);
3. Razmatranje Prijedloga rezolucije o zabrani slanja svih BH vojnih i policijskih formacija u misije u inostranstvo do donošenja odgovarajućeg zakona i aktivnostima u ovoj oblasti (predlagač: poslanik Zlatko Lagumdžija);
4. Razmatranje i sublimiranje poslaničkih prijedloga zaključaka proisteklih prilikom rasprave na Predstavničkom domu o Informaciji o stanju sigurnosti BiH;
5. Tekuća pitanja:
 - a) Informiranje o sjednici Komisije za reformu odbrane održanoj 17.09.2004. godine.

Prije usvajanja predloženog dnevnog reda, **Zlatko Lagumdžija** zamolio je članove Zajedničke komisije da zbog vlastitih obaveza koje ima u oku dana, da se tačka 3. razmatra kao prva tačka dnevnoga reda, , što je prihvaćeno sa 7 glasova za i 2 glasa protiv.

Također je istaknuo da su predlagači rezolucije pored njega i Jozo Križanović i Selim Bešliagić.

Ad.1. Razmatranje Prijedloga rezolucije o zabrani slanja svih BH vojnih i policijskih formacija u misije u inostranstvo do donošenja odgovarajućeg zakona i aktivnostima u ovoj oblasti (predlagači: poslanici Zlatko Lagumdžija, Jozo Križanović i Selim Bešlić)

Zlatko Lagumdžija istaknuo je da je svrha podnošenja predložene rezolucije ubrzanje zakonodavne aktivnosti u ovoj oblasti, te izražena potreba da se Parlament BiH izjasni o jednom ovako značajnom pitanju. Cilj je i da kod donošenja ovakvih odluka sve nadležne BH institucije, Predsjedništvo i ministarstva, pripreme cjelovit plan aktivnosti koji će biti predložen Parlamentu, a što je uobičajen postupak u svijetu. Također, bitno je i potrebno da se Parlament očituje i o tako značajnom pitanju kao što je pitanje preuzimanja vojne misije u BiH sa SFOR-a na EUFOR. Na kraju je istaknuo i pitanje Iračke krize, koja je ovom rezolucijom također dotaknuta, jer se želi iskazati politička volja nadležnih BH institucija za angažiranjem kroz razne vidove humanitarne pomoći iračkom narodu, a prije svega djeci.

Šefik Džaferović kratko je istaknuo da tačke 2., 4. i 5. iz Rezolucije može podržati jer su u skladu s Ustavom i Zakonom o odbrani BiH, dok tačke 1. i 3. ne može podržati jer nisu u skladu sa navedenim aktima. Članom 13.c) Zakona o odbrani BiH propisana je nadležnost Predsjedništva u odlučivanju o upućivanju jedinica u mirovne misije van zemlje, a što je Predsjedništvo već učinilo. Također, drugim odredbama Zakona propisana je nadležnost Predsjedništva i ministra odbrane BiH, te utvrđena njihova ključna uloga u lancu operativnog i administrativnog komandovanja. Tačka 1. Rezolucije zabranjuje ovim institucijama da djeluju u skladu s navedenim ovlaštenjima i onemogućuje funkcionalnost odlučivanja u datom trenutku. Stoga on ne može dati saglasnost za dalje razvlašćivanje ovih institucija u odlučivanju, jer je to suprotno Zakonu o odbrani BiH. Ista situacija odnosi se i na tačku 3. Ostale tačke podržava u potpunosti.

Momčilo Novaković ne može podržati cijeli tekst Prijedloga rezolucije, jer bi neke formulacije trebalo promijeniti. U tački 1. neprihvatljiv je termin “zabranjivati” i trebalo bi ga zamijeniti drugim odgovarajućim terminom. U odnosu na postojeću odluku Predsjedništva vezanu za Irak, a u kontekstu člana 13.c) Zakona o odbrani BiH, mišljenja je također da je diskutabilna jer ne postoji ratificiran međunarodni sporazum na kome bi se temeljila ova odluka. Tačka 2. prihvatljiva je izuzev navođenja naslova zakona, koji bi trebalo brisati. U tački 3., prvi dio je prihvatljiv, dok se drugi dio koji govori o poništenju odluka, ne bi mogao prihvatiti. U tački 4., istaknuo da je Vijeće ministara uopće nenadležno u ovoj oblasti, ali je dobro nastojanje da BiH pomogne u kriznim oblastima gdje je to moguće. Tačka 5. je prihvatljiva u potpunosti. Na kraju je istaknuo da je spreman prihvatiti Prijedlog rezolucije ukoliko predlagač prihvati primjedbe.

Halid Genjac upitao je kakav je međunarodni sporazum u slučaju Iraka postojao, obzirom da sve međunarodne sporazume ratificira Parlament. Dalje, predložio je da se amandmanskim djelovanjem Prijedlog rezolucije usaglasi sa stvarnim stanjem i da se potom o istoj odlučuje. U odnosu na tačku 1. predložio je da se umjesto postojećih termina koristi termin sugerira, te da se odluke usklade sa važećim zakonodavstvom BiH. U tački 3., umjesto poništavanja odluka trebalo bi navesti obavezu usklađivanja sa postojećim zakonodavstvom i zakonima čije je donošenje u toku.

Nikola Radovanović naveo je da pored misije u Iraku, trenutno postoje i misije u Etiopiji i Kongu, tako da je Rezolucija trebala obuhvatiti i te, kao i druge BH misije. Posebno je naglasio značaj tačke 5. iz Rezolucije, jer je neophodno da se Bosna i Hercegovina zvanično i pozitivno oglasi povodom preuzimanja ovlaštenja sa SFOR-a na EUFOR. Ovakvo zvanično izjašnjenje olakšalo bi rad svim institucijama BiH u Vijeću sigurnosti UN-a, kada bude razmatrana situacija u BiH.

Zlatko Lagumdžija izrazio je zadovoljstvo otvaranjem dijaloga povodom Rezolucije, jer je očito da svi imaju iste ciljeve koji se prije svega sastoje u zaštiti digniteta Bosne i Hercegovine. Saglasan je sa nekim prijedlozima vezanim za izmjene u Prijedlogu rezolucije. Tako je mišljenja da bi trebalo naglasiti obavezu Predsjedništva da osigura informiranje Parlamenta o strateškim sigurnosnim pitanjima. Razlika između misije u Iraku i ostalih misija je u tome da su ostale misije obavljane pod okriljem UN-a. U tački 1. saglasan je da se riječi “zabranjuje” zamjeni riječju “odlaže” i da se dalje navede “u skladu sa postojećim zakonodavstvom”. U tački 2., saglasan je da umjesto naziva zakona

stoje riječi “zakona koji će urediti cjelovito ovu oblast”. U tački 3. riječ “poništit” može se zamijeniti riječju “uskладiti”.

Osman Brka, obzirom na iznesene primjedbe, mišljenja je da se o Prijedlogu rezolucije ne može na ovoj sjednici izjašnjavati, već da bi za narednu sjednicu trebao biti sačinjen konačan tekst Prijedloga.

Seada Palavrić je također izrazila rezervu o izjašnjavanju na ovoj sjednici Komisije, s obzirom da su date primjedbe suštinskog karaktera. Stoga je predložila da se od Predsjedništva BiH, SKVP-a odn. Ministarstva odbrane BiH, zatraži potpuna informacija o aktuelnim i budućim mirovnim misijama izvan Bosne i Hercegovine pripadnika Oružanih snaga BiH, policijskih službenika, državnih službenika i ostalih zaposlenih. Tek po dobijanju predmetne informacije i njenom razmatranju na domovima Parlamentarne skupštine BiH, članovi Zajedničke komisije mogli bi se izjasniti o predloženoj rezoluciji.

Nikola Radovanović, u odnosu na formalno-pravnu stranu Rezolucije odn. član 13.c) Zakona o odbrani BiH, istaknuo je da države svojim članstvom u međunarodnim organizacijama preuzimaju prava i dužnosti koje su regulirane određenim međunarodnim sporazumima, bez posebnog potpisivanja tih sporazuma.

U odnosu na Irak, informirao je da su nakon intervencije u Iraku donesene tri rezolucije u UN-a, a zadnja rezolucija iz mjeseca avgusta ove godine poziva sve članice UN-a da svojim prisustvom doprinesu stabilnom okruženju. U odluci Predsjedništva sporno je jedino to što je ova odluka donesena prije rezolucije UN-a, dok je objektivno Predsjedništvo nadležno za donošenje odluke. Vijeće ministara bilo je obavezno sačiniti cjelovitu informaciju o ovom predmetu, te su formirane interesne radne grupe koje su sačinile tu informaciju sa svim aspektima iz pet ministarstava. Ova aktivnost je već ušla u ozbiljnu fazu, oficir za vezu 15.10. 2004. godine treba otići u SAD, u BiH dolaze timovi za obuku, vrši se selekcija osoba koja bi trebala ići u misiju.

Momčilo Novaković istaknuo je da su mu neke stvari mnogo jasnije nakon izlaganja ministra odbrane. Saglasan je s prijedlogom g-đe Palavrić da se zatraži cjelovita informacija, te da se nakon razmatranja te informacije na domovima i nakon ispravki u prijedlogu rezolucije, Zajednička komisija o istoj izjasni.

Vinko Radovanović saglasan je s prethodnikom. Upitao se da li je moguće da se zbog značaja tačke 5. u Prijedlogu rezolucije, ista nađe i pred Domom naroda, obzirom da je predlagatelj Rezolucije poslanik u Predstavničkom domu.

Jozo Križanović zahvalio se na ozbiljnoj i konstruktivnoj analizi Prijedloga rezolucije. Istaknuo je da se Rezolucijom nije željela dovesti u pitanje nadležnost bilo koje institucije BiH, ali se željelo iskazati stanje vezano za situaciju u Iraku, istaći obaveze prema Parlamentu, te utvrditi status osoba koje se šalju u mirovne misije.

Halid Genjac smatrajući dobrim prijedlog g-đe Palavrić, predložio je slijedeće zaključke, koji su članovi Zajedničke komisije jednoglasno usvojili:

1. Kolegijima oba doma Parlamentarne skupštine BiH sugerira se da od navedenih državnih institucija nadležnih za odlučivanje u ovoj oblasti, odmah zatraže cjelovitu Informaciju o svim aktuelnim i budućim mirovnim misijama pripadnika Oružanih snaga BiH i ostalih učesnika izvan Bosne i Hercegovine, te da navedenu informaciju uvrste na dnevni red naredne sjednice domova.

2. Predlagачu Rezolucije sugerira se, da do naredne sjednice Zajedničke komisije, sačini tekst Prijedloga rezolucije koji će biti u skladu s primjedbama i prijedlozima iznesenim na održanoj 13. sjednici Zajedničke komisije.

Ad.2. Razmatranje Prijedloga zakona o izmjenama i dopunama Zakona o uvozu i izvozu oružja i vojne opreme (predlagatelj: Vijeće ministara BiH)

Boško Šiljegović ukratko je informirao o Prijedlogu zakona o izmjenama i dopunama Zakona o uvozu i izvozu oružja i vojne opreme. Istaknuo je da na Prijedlog zakona nije bilo uloženi amandmani.

Nakon kraće rasprave, članovi Zajedničke komisije jednoglasno su usvojili principe Zakona, kao i Zakon u cjelini i uputili ga u dalju parlamentarnu proceduru.

Ad.3.Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlađač: poslanik Momčilo Novaković)

Boško Šiljegović dao je kratak pregled dosadašnjeg rada u vezi s predloženim Zakonom, te informirao o obavezi Radne grupe Zajedničke komisije, da do sjednice Komisije usaglasi stavove o amandmanima na Prijedlog zakona.

Momčilo Novaković istaknuo je da se Radna grupa usaglasila oko najvećeg problema koji je bio vezan za pitanje nadležnosti iz člana 13.c) Zakona o odbrani BiH, te da je to urađeno preformulacijom člana 1. Prijedloga zakona. Ova preformulacija podrazumjeva donošenje dvije odluke i to odluke o učešću koju bi donosio Parlament o odluke o upućivanju, kao operativne odluke koju bi donosilo Predsjedništvo. Na ovaj način ne krši se član 13. Zakona o odbrani BiH. U skladu s ovom izmjenom, Radna grupa usaglasila je još neke članove u Prijedlogu zakona.

Marina Pendeš je također istaknula najveći stepen postignute saglasnosti u Radnoj grupi u odnosu na materijal koji je predloženoj za ovu sjednicu.

Šefik Džaferović istaknuo je da je neophodno zakonom regulirati pitanje statusa osoba koje se upućuju u mirovne misije. Međutim, odluka o upućivanju je u nadležnosti Predsjedništva, saglasno Zakonu o odbrani BiH. Pri tome, Parlament ima pravo da vrhovnim autoritetom zahtijeva od Predsjedništva i drugih institucija da obrazlože svoje odluke. Stoga, po njegovom mišljenju zbog opterećenosti situacijom u Iraku, predloženim zakonom želi se izmijeniti sistem operativnog i administrativnog komandovanja, što on ne želi podržati.

Momčilo Novaković nije bio saglasan s prethodnikom. Istaknuo je da je predlažući ovaj zakon želio da Parlament bude ovlašten za donošenje odluke o učešću. Mišljenja je da je Radna grupa sačinila kompromisno rješenje, te da bi se na ovoj sjednici trebali konačno izjasniti o Zakonu.

Seada Palavrić istaknula je da je cilj donošenja svakog zakona izmjena postojeće regulative kada se za to ukaže potreba. Predlađač je u ovom slučaju želio da nadležnost za odlučivanje pređe sa Predsjedništva na Parlament, a pri tome je bio potpuno kooperativan i otvoren za saradnju. Stoga je predložila da se Komisija izjašnjava o usaglašenim amandmanima, te da se sačini prečišćeni tekst Zakona sa usaglašenim amandmanima, na kraju čega bi se nalazilo obrazloženje.

Nikola Radovanović naveo je ovaj zakon od velikog značaj, da je učinjeno dosta napora, te da predstavlja dobru osnovu. Članovima 36. i 38. Zakona o odbrani BiH regulirana je nadležnost Parlamenta, koja predstavlja zakonsku osnovu za donošenje odluke o učešću u mirovnim misijama. Članovima 60. i 62. regulirano je pitanje nadležnosti za odlučivanje u slučaju vanrednog stanja. Potom je istaknuo određene nejasnoće u predloženom zakonu oko nadležnosti za odlučivanje kada su u pitanju humanitarne operacije, kada je u pitanju hijerarhija u komandovanju i sl.

Seadu Palavrić zanimala je definicija neprihvatljivog rizika za živote učesnika u mirovnim operacijama, na što je **Nikola Radovanović** odgovorio da se sa sigurnošću navedeni rizik ne može definirati, jer svaka operacija sa sobom povlači odgovarajući stepen rizika.

Halid Genjac zahvalio se ministru odbrane zbog odgovornog odnosa prema ovoj komisiji i Parlamentu u cjelini. Potom je istaknuo da kod Prijedloga zakona nisu zastupani principi međunarodnog prava, te da se novim amandmanima otišlo još dalje u tom pravcu.

Kako je u međuvremenu, na samoj sjednici, predložen novi set amandmana kojim su se nastojale u što većoj mjeri usaglasiti odredbe Prijedloga zakona sa Zakonom o odbrani BiH, to su članovi Komisije jednoglasno prihvatili prijedlog Boška Šiljegovića za određivanje pauze u trajanju od jednog sata, u kome su članovi Radne grupe ove amandmane koje je preuzeo Adem Huskić, trebali razmotriti i sačiniti konačan radni materijal za odlučivanje na nastavku sjednice Komisije.

U nastavku sjednice članovi Zajedničke komisije jednoglasno su usvojili slijedeći zaključak :

1. Zajednička komisija zahtijeva od Ministarstva odbrane BiH da u roku od sedam dana dostavi mišljenje u pismenoj formi o amandmanima Radne grupe ove komisije (koje je preuzeo poslanik Adem Huskić), koji su usaglašeni u pauzi zasjedanja 13. sjednice Komisije kao i, o Prijedlogu zakona o učestvovanju pripadnika Oružanih snaga BiH, državnih službenika, i ostalih zaposlenih u mirovnim operacijama i drugim aktivnostima u inostranstvu, predlagача Momčila Novakovića, u čiji tekst su ugrađeni usaglašeni amandmani, a u odnosu na postojeću zakonsku regulativu, prije svega Zakon o odbrani BiH, koji reguliše nadležnost pojedinih institucija BiH u ovoj oblasti.

Ad.5. Tekuća pitanja:

a) Informiranje o sjednici Komisije za reformu odbrane održane 17.09.2004. godine

Nikola Radovanović informirao je o najznačajnijim pitanjima i usvojenim zaključcima Komisije za reformu odbrane, koja je održana 17.09.2004. godine. Istaknuo je posebno izvještaj o reformi vojo-obavještajnog sektora. Ovu obavezu, u skladu sa Zakonom o odbrani BiH i odlukom Vijeća ministara BiH, bilo je potrebno sprovesti do 30.09. 2004. godine, a što je i učinjeno na navedenoj sjednici. OSA se pri tome potvrđuje kao najviša obavještajno-sigurnosna služba u BiH, dok Vojno-obavještajna služba predstavlja rod sa operativno-taktičkim nivoom nadležnosti. Formiranjem ove službe povećat će se i broj zaposlenih u Ministarstvu odbrane BiH. Također, posebno je potencirano pitanje odnosa institucija u ovoj oblasti i to Ministarstva odbrane, Ministarstva sigurnosti, Ministarstva vanjskih poslova, Predsjedništva, Vijeća ministara i Parlamentarne skupštine BiH. Stoga je na sastanku zaključeno da se uputi pismo g-dinu Kočišu, koji se bavi pitanjem reforme obavještajnog sektora, s prijedlogom za formiranje Interresorne grupe koja bi pitanje odnosa navedenih institucija u potpunosti razjasnila.

Ministar je dalje informirao o pitanju smještaja Ministarstva odbrane, koje bi se djelimično riješilo na način da se dio prostora Ministarstva odbrane FBiH ustupi ovom ministarstvu. Također je istaknuo i prijedlog ministra odbrane RS-e koji je Komisija podržala, da se na teritoriji RS-e, u Lukavici, izgradi jedan objekat u kome bi bio smješten određeni broj zaposlenih u Ministarstvu odbrane BiH. Pored pitanja smještaja, ponovo je istaknuo pitanje zapošljavanja, pitanje budžeta ove institucije i sl.

Posebno pitanje razmatrano na ovom sastanku, bilo je pitanje deminiranja i formiranja jedne zajedničke jedinice za navedenu svrhu. Ovo pitanje definirano je i Zakonom o odbrani BiH, kojim Ministarstvo odbrane BiH ima nadležnost za operativnu upotrebu Oružanih snaga BiH, pa time i ovih jedinica. U skladu sa Zakonom o odbrani BiH, organizacija vojnog deminiranja bit će takva da će se formirati Agencija za deminiranje na nivou BiH.

Kao jedno od najznačajnijih pitanja ovog sastanka, g-din Radovanović je informirao o pitanju prijenosa nadležnosti sa SFOR-a na snage EUFOR-a do kraja ove godine, kada se završava i rad Komisije za reformu odbrane. Dalje aktivnosti u ovoj oblasti preuzet će NATO.

Na upit **Seade Palavrić**, da li je uslov za dobijanje 25 miliona eura formiranje jedinice za deminiranje na nivou BiH, g-din Radovanović je istaknuo da je to pitanje još uvijek otvoreno i da se ta jedinica neće formirati u dogledno vrijeme, pri čemu je funkcija deminiranja uređena tako da će se tim procesom upravljati iz Ministarstva odbrane BiH. Trenutno u BiH egzistiraju tri agencije za deminiranje u okviru vojnih struktura, što je dovoljno za ispunjavanje uslova za dobijanje sredstava. Pri tome je po njegovom mišljenju nerealan iznos od 25 miliona eura. Trenutno 520 osoba radi na pitanju deminiranja, od čega je oko 300 osoba aktivno uključeno, dok ostale osobe rade administrativne poslove.

Nakon predmetnog informiranja, članovi Zajedničke komisije primili su Informaciju k znaju.

b) Boško Šiljegović predložio je, a članovi Zajedničke komisije jednoglasno usvojili, da se u skladu sa zaključcima prethodnih sjednica Komisije, donese slijedeći zaključak:

1. Zahtijeva se od Ministarstva odbrane BiH da Zajedničku komisiju izvjesti o trenutnom stanju popunjenosti ljudstvom do naredne sjednice ove komisije, koja treba biti održana u roku od sedam do deset dana, a u kontekstu ranije dostavljenih zaključaka kojim je ovo ministarstvo trebalo do kraja mjeseca septembra tekuće godine izvršiti popunu ljudstvom u procentu od 65%.

c) Izvještaj sa službenog puta u Segedin i Budimpeštu, u trajanju od 28.09.do 01.10.2004. godine, u organizaciji Ministarstva vanjskih poslova i Ministarstva odbrane Mađarske, radi učešća na seminaru pod nazivom «Partnerstvo za mir i saradnju», kome su prisustvovali Branko Zrno, Dragica Hinić i Željko Grubešić, kao i izvještaj sa službenog puta u Brisel, kome su prisustvovali eksperti za pomoć u radu komisijama za odbranu, članovi Zajedničke komisije primili su k znanju.

d) Izvještaj sa službenog puta u Oberamergau, u trajanju od 27.09.do 01.10.2004. godine, u organizaciji NATO škole, radi prisustva kursu sigurnosne saradnje za BiH, informativno je obrazložio Enes Bećirbašić.

e) Članovi Zajedničke komisije jednoglasno su usvojili zaključak kojim je sekretar Zajedničke komisije zadužen da, do naredne sjednice Komisije, sačini pregled prisustva članova sjednicama Komisije.

f) Članovi Zajedničke komisije upozorili su Radnu grupu ove komisije koja je imala obavezu a nije to uradila, da sačini radni materijal sublimiranih prijedloga poslaničkih zaključaka proisteklih prilikom rasprave na Predstavničkom domu o Izvještaju o stanju sigurnosti BiH. Ovo pitanje je već u dva navrata skidano sa dnevnog reda Zajedničke komisije. Stoga članovi Radne grupe do naredne sjednice trebaju konačno pripremiti navedeni radni materijal.

g) Christian Haupt ukratko je informirao o planu posjeta članova Zajedničke komisije određenim institucijama u BiH i izvan BiH do kraja tekuće godine, kao što su Ministarstvo odbrane FBiH, BH MAC, Hrvatski sabor, DGS-i u Trebinju. Također je istaknuo da je planirana i prezentacija vojnih budžeta odn. budžeta Ministarstva odbrane BiH, Ministarstva odbrane FBiH i Ministarstva odbrane RS.

Zapisnik sačinila:
Dragica Hinić

Privremeni predsjedavajući
Zajedničke komisije:
Boško Šiljegović

